

四庫全書

史部

欽定四庫全書

史部

建炎以來繫年要錄卷一百六十四至
六

詳校官侍讀學士臣陸伯焜

侍讀臣孫球覆勘

騰錄監生臣陳長春

騰錄監生臣李永厚

欽定四庫全書

建炎以來繫年要錄卷一百六十四

宋 李心傳 撰

紹興二十有三年

歲次癸酉
楊王亮貞元

金海陵
元年

春正月

按是月
辛卯朔

已亥左朝散郎致仕高閎卒閎退居明州太師秦檜欲
卜其向背因其鄉人姚孚者達意於閎欲以弟之女子
其子閎辭之遂致其仕絕口不言時政杜門觀書卒免
於禍云

癸卯太保昭慶軍節度使萬壽觀使平樂郡王韋淵為
太傅

己酉降授平海軍承宣使提舉台州崇道觀台州居住

李顯忠復寧國軍節度使以赦叙也

顯忠行狀云降居丹邱十餘年會時

宰物故太上皇帝知公被黜非辜召還復寧國軍節度使誤也今不取

顯忠再除節鉞不

降麻亦非故事

隆興元年十一月劉寶乾道五年十一月顯忠再復節鉞並學士院降麻此除或

是秦檜抑之當考

翊衛郎階成西和鳳州兵馬都鈐轄克御

前後部統制軍馬吳拱為榮州刺史上召拱入朝故有

是命

庚戌左奉議郎臨安府府學教授鄭仲熊為國子監主簿仲熊西安人也

乙卯詔四川綱馬令承旨司看驗自今有瘡疥瘦瘠者押馬使臣更不推恩其芻粟令所過州如法應副尋不

行

五月巳丑再降旨依舊格推賞

丁巳右文殿修撰提點佑神觀秦墳陞敷文閣待制久任在京宮觀以墳奉祠滿歲故也檜辭不受

戊午右朝散郎知鎮江府王循友移知建康府

趙桂之遺史云

王循友乞加秦檜九錫雖不行俄自知鎮江遷循友知建康府識者不敢言惟以目相視按循友以十七年三

月罷吏部侍郎其乞加檜九錫當在未罷之前今附此更須詳考

是月昭信軍節度使士奎薨追封安化郡王錄其子右

宣教郎不諱等三人為直秘閣它子弟遷官改秩除官

者七人卹典如執政

二月己未

按正月辛卯朔己未二十九日原本作二月誤以下月考之當以庚申為二月朔

詔

岳陽軍節度使開府儀同三司萬壽觀使士樽權主奉

濮安懿王祠事

癸亥上幸玉津園遂詣延祥觀

己巳吏部尚書林大鼐罷右正言史才論大鼐狂躁欺誕父在而不迎侍陛下擢宋樸為樞密大鼐以其出已上憤然不平若不亟去必搖國是故大鼐遂罷

庚午鬻虔州軍賊黃明等八人於市明等據州城凡百有十二日

辛未改虔州為贛州州漢贛縣地貢水自新樂山至城

東北與章水合故名焉先是秘書省校書郎董元德面
對論虔州謂之虎頭城非佳名今天下舉安獨此郡間
有小警意其名有以兆之望賜以美稱事下中書後省
至是擬定又請改虔化縣為寧都從之

壬申直龍圖閣都大主管成都等路茶馬監牧公事汪
召嗣與宮觀差遣以尚書省言綱馬不如數故也 右
朝散郎成都府路提點刑獄公事湯允恭都大提舉成
都府利州路茶事兼提舉四川等路買馬監牧公事

乙亥左宣教郎王綸克諸王宮大小學教授綸江寧人
也

丙子復置光祿寺丞一員專掌祠祭禮料即惠照院齋
坊儲之以吏部郎中兼權太常少卿沈虛中言今醢醢
之屬皆制在市司慮其不虔故也至是以故偽福國長
公主第為光祿寺

庚辰樞密院編修官楊愿守尚書工部員外郎直秘
閣主管台州崇道觀鄭震提舉兩浙路市舶震驤子也

辛巳左朝奉郎林大鼐知泉州

大鼐以此月六日乙丑
得旨放罷今纔十七日

乃即除郡不
知何故當考

癸未龍神衛四廂都指揮使忠州團練使殿前司遊奕

軍統制措置盜賊節制軍馬知贛州李耕以功為金州

觀察使於是諸將劉綱等九人各遷二官將士受賞者

萬三千百二十有四人方贛之亂也本州居住人降授

左朝散郎提舉江州太平興國宮孫近走吉州避之至

是復還其州未幾卒

熊克小歷稱近以秘書少監分司
南京謫居接近落分司已久紹興

十四年六月癸未自左朝散大夫提舉江州太平興國宮興國軍居住坐奏薦事降三官移南安軍二十年八月又移虔州依舊宮祠克恐差誤

三月庚寅朔殿中侍御史魏師遜右正言史才並兼崇政殿說書

丙申慶遠軍節度使知洪州張澄知福州 龍圖閣直學士知福州張宗元知洪州

丁酉詔太尉吳璘楊政田師中並給真俸時璘以依楊存中指揮援存中所得張浚例有請朝廷因併政師中

給之 敷文閣待制知平江府徐琛以疾求去陞敷文閣直學士提舉江州太平興國宮

癸卯平海軍承宣使知南外宗正事士瑀言宗子善軫在學實及二年文藝卓然衆所推譽乞免文解一次上曰近日宗子多讀書殊可喜也

丙午御史臺主簿胡襄面對論諸邑主簿多不銷民戶輸納之鈔往往勒令重輸乞戒飭詔申嚴行下襄永嘉人也 光山軍節度使開府儀同三司提舉西京嵩山

崇福宮齊安郡王士儂薨于建州訃聞贈太傅追封循王六子皆進官二等女封郡主諸妾受封者五人

丁未鎮江府駐劄御前諸軍都統制劉寶乞令民戶識認軍莊營田者每畝賞開耕工本錢五千五百從之尋

詔諸路倣此

詔諸路在九月戊戌今併書三十二年三月庚子所書可參考

司農寺

主簿盛師文面對論諸州都監諸縣巡尉擅置刑獄乞申嚴法禁詔刑部申嚴行下

戊申左朝請郎范彥輝追毀出身以來告勅文字除名

勒停永不收叙送荆門軍編管初彥輝為太府寺丞嘗
作夏日久陰詩云何當日月明痛洗蒼生病殿中侍御
史魏師遜奏彥輝陰懷異意謗訕朝廷法寺鞠實故有

是命

彥輝罷寺丞在二月丙寅今併書之

辛亥直龍圖閣提舉台州崇道觀汪召嗣知潭州

召嗣以失

職罷茶馬繞四十日便除大藩前未有此當考

召嗣未至官而卒

壬子詔故武功大夫貴州刺史楊宗閔賜謚忠介故敷
武郎知麟州建寧寨楊震賜謚恭毅二人楊存中祖父

皆以死事故用存中請也

癸丑軍器監丞黃然面對論福建江浙販牛屠賣十百為羣乞重立賞格許人告捕詔申嚴行下 左宣義郎

江南西路轉運司主管文字王歷候今任成資日優與陞擢差遣以知贛州李耕言其應副軍須有勞故有是

命

歷會弟已見

歷寓居撫州恃秦檜之勢凌奪百姓田宅甚

於寇盜江西人苦之 右武郎幹辦皇城司劉允升劉伉並特遷右武大夫以訓練禁旅有勞特推恩也

是春金主亮徙都燕京下詔改元貞元不肆赦内外文武皆進官一等改燕京析津府為大興府號中都為中京會寧府為北京汴京開封府為南京而舊遼陽府為東京大同府為西京如故分蕃漢地為十四路置總管府名都城門十二命近臣王競書之名太廟曰衍慶宮以奉太祖是太宗晟德宗宗幹神主又作元廟於其東

以奉英格已上

張棟金人誌云英格謚大聖皇帝廟號仁祖而洪皓松漢記間云英格謚孝平

皇帝廟號穆宗二書不同按皓歸以紹興十三年而棟之作誌在淳熙三年疑後來復有所改然大聖乃何古

達謚號棟恐誤
記疑不能明也

舊取士無殿試亮始復之凡鄉試三人

而取一府試四人而取一府試分六路河北及燕人於
大興遼之東北於會寧山後及河東人於大同山東人
於東平河南人於開封關中人於河中通以五百人為
合格殿試又黜之榜首即授奉直大夫翰林應奉文字
後又罷經義神童等科惟以詞賦法律而已金之用刑
舊有沙袋亶立始去之亮立又去杖脊凡徒刑止以荆
決臀為其近人心故也徒刑五等自五年至一年皆使

之雜作滿則釋之亮又定車蓋之式后妃車飾以金三品以上飾以銀自后妃至五品皆朱輪六品以下黑綠而已舊親王宰執用紫蓋亮始削之惟太子用紅諸妃用紫三品以上用青皆以羅四品五品用青皆以絹餘

不得用

此事必非一年所為今且因遷都附見

亮至燕以平章事郤王蕭

裕有參畫之功拜裕尚書右丞相兼中書令

以兩國編年金人誅

蕭裕詔張棣金人誌參考修入熊克小歷亮徙燕在二十二年冬今從編年張棣又云大赦偽境按亮詔云除參酌不肆赦外可改元貞元棣誤也詔書具于后門下朕以天下為家固無遠邇之異生民為子豈有親疎之

殊眷惟舊京邇在東土四方之政不能周知百姓之寬
艱于赴愬况觀風俗之美惡察官吏之惰勤必宅所居
庶便于治顧此折津之分實惟輿地之中參稽師言肇
建都邑迺嚴宗廟之奉迺相宮室之宜遂正畿封以作
民極雖衆務之畢舉冀暫勞而久安逮茲落成消日涖
止然念驟興于役力豈無重擾于黎元凡有科徭皆其
膏血遂至有司之供具亦聞享上以盡心宜加撫存各
就休息載詳前代赦宥之典多徇一時姑息之恩長惡
惠姦朕所不取若非罰罪而勸善何以勵衆以示公今
來是都寰宇同慶因此斟酌持有處分除不肆赦外可
改天德五年為貞元五年燕本列國之名今為京師不
當以為稱號燕京可為中都仍改永安折津府為大興
府上京東京西京依舊外汴京為南京中京為北京又
爵祿所以勵世而磨鈍也前此官吏每有覃轉資級賢
否不辨何補治功緣今定都之始所冀上下協衷恪恭
迺事若俾一夫不獲其所則何以副朕遷都為民之意

故特推恩以示激勸可應內外大小職官並與覃遺一官於戲京師首善之地既昭示于表儀詔令責成之方其勿怠于遵守咨爾有衆體予至懷

夏四月庚申朔詔江南西路轉運判官盧奎特轉一官慶遠軍節度使新知福州張澄轉一官田授以樞密院言叔捕贛州叛兵帥司遣發官兵會合漕司應副錢糧別無闕誤故也

壬戌大理評事莫濛面對論官司遣人追逮罪囚多所邀乞詔刑部申嚴行下

乙丑秦檜奏以權吏部侍郎陳相接伴北使閤門宣贊
舍人張彥攸副之上因曰今後奉使須選醇謹之人至
如武臣作副亦當慎擇彥攸開封人也

甲戌上謂大臣曰近今臨安府收捕破落戶編置外州
本為民間除害而所謂小火下者乃為人訴其恐嚇取
錢妄有供具本非為民除害之本意可令有司子細根
治務得其實先是行在有號破落戶者巧於正晝通衢
竊取人所帶之物秦檜得其姓名悉奏分遣外州拘之

上恐因而擾人故有是諭

熊克小歷載此事于五月癸酉按今年五月巳丑朔無癸

酉克歷

恐誤

丙子右朝奉大夫張柄復為大理少卿

辛巳詔諸州編管羈管人在法止許月赴長吏廳呈驗

聞比來囚禁鎖閉甚於配隸可令遵守成憲如走失捉

獲人即具名申尚書省別作行遣

臣謹按是時朝士如胡銓吳元美士人如

智決等以秦檜所擠編管者甚衆所在望風以流人為奇貨多搢辱之今此指揮日歷但云有旨則是出自上

意非由臣下及官司

陳請也故表出之

乙酉詔利州歲鑄錢以九萬緡為額視舊額減五分之

二

二十五年七月丁巳所書可參考

仍並鑄折二錢

丙戌太師尚書左僕射秦檜言臣昨者京城獨入議狀不隨衆人推戴張邦昌寔人臣分義不得不然其後邦昌同門壻朱勝非及妻家使臣換文資程昌寓相與協謀極力排擯蹤跡詭險欲蓋彌彰昌寓任鼎州鎮撫使日於不係所管邵州擅取常平錢米本州守法未敢起發乃移文欲遣軍馬就食其跋扈不軌何異李允文等

朝廷以軍興隱忍未發昌寓懷不自安乃於勝非再相之日以自己所得詔書刻置鼎州廳事又於碑文公肆誕言掩其私交之迹歸非於上今勝非昌寓雖死其徒實繁陰謀未已伏望聖明降鑒若昌寓不當以已事列置公廳即乞明降指揮以上件碑石別刻本州所受詔書庶允衆聽從之

五月庚寅刑部侍郎韓仲通言近郊赦時禁州縣不得挾私意籍罪人家產恩德至渥也而守令猶有易以追

賞錢為名且違法制多立其數至數百千致竭其產雖
嚮妻子不足以償望詔有司申嚴禁止詔刑部申嚴行

下

甲午右朝散郎通判福州葉仁特展二年磨勘左從事

郎福州閩縣丞兼權察推林亮功特降一資以鞫鄉貢

進士鄭煒簽書不當也

按此當是吳元美謗訛事不知何以許時方行遣也

丙申武德郎李昌齡特追一官勒停昌齡為清河郡王

張俊掌房緡坐不依聖旨減放故有是命

己亥右承奉郎楊倓為籍田令倓僕弟也

庚子右朝奉郎就權利州東路安撫司主管書寫機宜
文字楊庭言興元府褒斜谷有古六堰溉民田甚廣兵
火後修不以時水至輒壞若全以食水戶修葺恐致民
力重困欲每遇夏月水泛於見屯將兵內差不入隊兵
卒併手修葺興元自兵亂以來城內生荆棘官民皆茅
屋而帑藏寓僧舍自太尉楊政再為帥以次繕治至是
一新戶口浸盛如承平時矣政嘗葺學舍府學教授青

神唐迪請增學田以廣養士政從之時有欲以學田饋軍迪言大軍歲費四千萬而欲取學田以當賦何啻九牛一毛又豈愛禮存羊之意邪論者乃止

癸卯尚書省言人使來程淮南轉運司應副酒食多不足備合行約束詔回程須管足備不得誤事令先具知委文狀申省

甲辰直顯謨閣知揚州向子固罷時北使赫舍哩大雅過其州子固遇諸衢不即引避大雅以為言故有是命

乙巳詔敷文閣待制四川安撫制置使兼知成都府曹
鈞年老累乞便郡可移知宣州 左承議郎池州居住

蕭振復敷文閣待制四川安撫制置使兼知成都府

辛亥金國賀生辰使副中奉大夫秘書監兼右諫議大
夫赫舍哩大雅廣威將軍尚書兵部郎中兼四方館副
使蕭簡見于紫宸殿

癸丑右承議郎知大宗正丞張宗元面對乞令諸州按
月支給宗室孤遺錢米從之

六月己未上謂大臣曰近遣內侍往盱眙賜北使宴乃
擅買北貨非便已令拘收入官庶少懲戒 左承議郎
王之道通判安豐軍之道以上疏言兵故坐黜者十四
年

辛酉上謂大臣曰近日霖雨軍營多壞已賜錢七萬緡
令整葺聞所在民田有被水患者可下州縣遣官檢放
苗稅

壬戌國子監丞兼權祠部員外郎吳武陵面對乞申嚴

荆湖福建士民不舉子之禁令保伍更相覺察月上娠產之數于官兼申給錢之令則全活嬰孺將不可勝計詔監司丁寧州縣悉意奉行其有顯績去處保明申奏推賞

甲子詔每歲交割歲幣官員雖多止以十三年分六員所得減年細計分受以前盱眙軍錄事參軍蔡翬言其泛濫故也左朝奉郎張闡添差通判衢州

乙丑大理寺丞丁仲京面對乞以前後已行軫恤庶獄

事理撮其要語揭示通衢使天下之民瞻視鼓舞遷善
遠罪而不忍犯詔申嚴行下

丁卯直龍圖閣主管台州崇道觀舒清國卒

己巳右朝奉郎利州東路安撫司主管書寫機宜文字
楊庭特遷右朝散郎直秘閣賜紫章服尋以庭通判階
州 詔直秘閣兩浙東路提點刑獄公事秦昌時令自
成資後別理今任月日候再任成資滿日取旨

庚午詔民戶典賣田地毋得以佃戶姓名私為關約隨

契分付得業者亦毋得勒令耕佃如違許越訴比附因
有利債負虛立人力雇契敕科罪以言者有請從戶部
立法也

壬申尚書駕部員外郎齊旦為樞密院檢詳諸房文字
忠翊郎閤門祇候王謙為閤門宣贊舍人謙晉錫養
子用晉錫大理奏薦及減五年磨勘恩例回授也

丙子右正言史才言諸路州軍起綱赴行在所交納至
有折欠之數並將合千人押下排岸司追理排岸非刑

法官司無所研問得其人則使監守夜則寄禁錢塘仁和兩縣獄中身為囚繫欲償無路欲望並令即時具名數申解所屬見得有侵盜貿易之弊者送大理寺推治其過誤損失並押下元起綱處依法備償附綱起發從之

己卯大理評事莫濛面對乞令州縣編配罪囚並依程限遣行詔申嚴行下 是日潼川大水涪江漲

庚辰元武江漲水四面壞城奄至人方惶駭爭保城西

牛頭山寺山趾大溪橋壞水大至平地丈五尺人之死者甚衆

辛巳左朝奉郎廣南西路提點刑獄公事田如鼇直秘閣以其嘗在贛州有勞也 左朝議大夫李健卒

壬午左朝散大夫提舉荆湖南路常平茶鹽公事王珏為荆湖北路轉運判官鄂州征民竹木并役之作堤捍江歲歲水齧堤壞珏募人厚與之直伐石於漢陽以為堤凡五百十九丈堤成水大至不能齧岳州賦于民者

畝增二畝謂之毛種珏聞立罷之

癸未上謂大臣曰靜江府士人上書乞增解額及減稅二事可令有司看詳稅額乃胡舜陟妄增尤為民害不可不減也 秘書省校書郎董德元面對言明年省試

太學士人承教已久入仕必衆須用補試以收後來之俊彥欲乞諸州補試人各限其數上郡不得過二十人中郡十五人下郡十人臨安府倍上郡之數流寓各在寄居郡數之內每以省試年夏季為率許士人詣本州

投狀令佐保明委教授簾試賦一首或經義二道取文理優者申州給據赴太學補試若當年省試下願就補者聽不在此數不許非時投狀乞試如此則人知天子之學不可造次而入凡預補者無不自愛臣又聞既補入學而聽讀日少在告日多長假與特給假固有法矣今則特給展至三年而不禁在學與在假固有法矣今則三年在假而取解與在學者等如此恐不足以懲勸欲望委國子監自今秋科舉以後檢舉學令施行則

人皆勉勵無復輕去上庠矣詔禮部看詳申省

丙戌左從事郎張震為太學博士入內東頭供奉官

裴詠除名瓊州編管永不放還詠往盱眙撫諭北使私市北貨尋被拘收心懷怨望有指斥語法當絞特貸之

此即已未日上語及之者也

丁亥故武功大夫殿前司統制吳進持贈右武大夫果州團練使故武節大夫江西安撫司同統領馬晟特贈武功大夫忠州刺史二人皆為贛賊所殺故錄之

是月南康軍言宗子不磔割肝愈母疾

建炎以來繫年要錄卷一百六十四

建炎以來繫年要錄卷一百六十四金人地名考證

英格

原書作楊剌
誤改見卷二

阿古達

原書作阿骨打
誤改見卷一

赫舍哩

原書作統石
烈誤今改正

--	--	--	--	--	--	--	--	--

欽定四庫全書

建炎以來繫年要錄卷一百六十五

宋 李心傳 撰

紹興二十有三年秋七月

按是月戊子朔

己丑詔民間所欠私

債還利過本者並與依條除放先是温州布衣萬春上書乞將民間有利債負還息未還息及本未及本者並與除放庶幾少抑豪右兼并之權而伸貧民不平之氣詔送戶部上謂大臣曰若止償本則上户不肯放債反

為細民之害可令仔細措置至是行下

上語在五
月壬寅

庚寅右正言兼崇政殿說書史才試右諫議大夫殿
中侍御史兼崇政殿說書魏師遜試侍御史

辛卯諸王宮大小學教授王綸面對乞委有司將先聖
從祀之士詳加蒐括自國子監為始重行綵繪以其式
鏤板遍下諸郡縣詔送禮部

壬辰詔平江府湖秀州實被水貧乏下戶未納夏稅並
權住催理俟秋成日輸納用戶部請也

丙申右承議郎幹辦行在諸司糧料院張常先提舉江

南西路常平茶鹽公事常先叔夜子故超用之

按紹興二十六年

年十月凌哲劾劉伯英章疏稱伯英在江西從人至服文繡知撫州趙士鵬疏其事秦檜不得已遣張常先代之使離任日歷二十一年閏四月甲辰右奉議郎劉伯英提舉江西常平茶鹽公事今附此更須詳考

戊戌太師尚書左僕射秦檜言臣伏惟陛下昨自軍興之初為宗社生靈計躬至軍前權與和好因上格天心中興國祚臣至愚極陋繼亦將命出於自請當是時豈意有今日依乘風雲之幸蓋捐軀殉國萬一近似乃得

與今日休兵保邦之大議非偶然也靖康之末邦昌僭號臣獨不戴異姓乞於皇宗不預背盟之議者選擇繼統其後軍前取出欲行懲斷幸而不死驅之遠去臣終不變初議至為徽宗草書以為南朝有子不當相待遽如石晉北朝雖傲岸自用猶即遣人厚送錢絹至盈萬數後有傳錄至中朝者其本尚在可考不誣愚臣君臣之契與立朝本末如此昨自初還朝時首奏令劉光世通書請好其後呂頤浩都督在外臣又奏遣北人招討

都監門客通書求好未幾邊報王倫來歸頤浩遂欲攘以歸己力援張邦昌友壻朱勝非來朝繼而圍城中人絃索禮與頤浩勝非援邦昌時受僞命人謝克家復來經筵當臣之求去也陛下撫諭再三恩意款密臣獨以書生不識事體以必退為真是時頤浩乃與權邦彥同日留身乘間建言以謂宰相之去乃無一事於是旋易臺諫擬請御筆至密禮草制之日請以為據密禮被逐常以所得御筆公示廣衆不知事君之體至於如此士

大夫雖每竊笑然臣以出處自有本末後世當有公議
不必與此輩較曲直故不論今室禮已死無子獨有女
嫁謝克家之孫伋之子若不收拾所降御筆復歸天府
則萬世之後忠逆不分微臣得君立朝無所考信實害
國體伏望特降睿旨令台州取索室禮所受御筆繳進
仍以臣今奏疏送付史館永以傳信不勝幸甚從之王明

清揮塵後錄紹興二年秦會之罷右僕射秦叔厚之文
襜職告詞謝任伯之文秦謝姻家也秦大憾之先是高
宗有御劄云秦檜不知治體信任非人人心大搖恣器
載路乙亥秦詢知御劄在任伯之子伋景思處作劄子

自陳大綰云陛下是時尚未深知臣所以有此乞行抽
取付旨下台州從假取索得之按謝克家建炎四年秋
自禮部尚書除參知政事紹興元年春以資政殿學士
奉祀明年春泰檜免相克家無緣草制詞蓋恭密禮無
子而女歸謝假之子故御札在謝氏耳檜此奏在二十
三年癸酉今云乙亥亦誤兼疏中具言其初乞罷時上
眷甚厚而呂頤浩輩留身旋請御筆亦無陛下尚
未深知臣之說蓋明清聞之不審因筆之於書耳

癸卯右朝請大夫主管台州崇道觀劉領特貸命除名
勒停送瓊州編管仍籍沒家財左朝議大夫提舉臨安
府洞霄宮郴州居住折彥質特降一官領嘗知郴州忠
訓郎孟導為永興縣尉鞠劫盜妄通土豪承節郎蕭汝

霖領以為信遣導率射士焚其居而捕之斬汝霖彦質
 坐與汝霖交通請佃舊縣基為居第並為本州通判案
 發法寺鞠實故有是命於是領之子將仕郎絃亦追毀
 所授文書送惠州道除名送韶州並編管兵官武節郎
 辛堅之從義郎李世顯皆除名編管湖南

本州通判
姓名當考

戊申將作監主簿孫壽祖面對論湖廣夔峽多殺人而
 祭鬼近又寢行於他路浙路有殺人而祭海神川路有
 殺人而祭鹽井者望飭監司州縣嚴行禁止犯者鄉保

連坐仍毀巫鬼淫祠以絕永害從之

庚戌右諫議大夫史才言浙西民田最廣而平時無甚害之憂者太湖之利也數年以來瀕湖之地多為軍下兵卒侵據為田擅利妨農其害甚大隊伍既眾易於施工累土增高長堤彌望名曰壩田旱則據之以溉而民田不沾其利水則遠近汎濫不得入於湖而民田盡沒矣欲望委本路監司躬行究治盡復太湖舊迹使軍民各安其職田疇盡蒙其利從之

辛亥敷文閣待制林又引年告老詔遷一官致仕

癸丑大理寺主簿吳伸面對乞諸縣鎮寨土兵不得假借及私役差出以妨教閱從之

是月少保昭化軍節度使醴泉觀使駙馬都尉和國公潘正夫薨于婺州贈太傅官給葬事

八月戊午朔侍御史魏師遜言近歲州縣小官既滿而監司郡守不與批書多致狼狽若謂催科未足獄案未具合前期督察望勅監司郡守既滿即與批書如更挾

私意令御史臺按劾從之

熊克小厯作侍御史鄭仲熊言按仲熊此時纔為國子監

主簿克

蓋誤也

癸亥大理正石邦哲面對論監司郡守車服踰侈乞禁
戒詔在內委御史臺彈奏在外令監司舉劾仍互察

右武郎潘堯夫添差兩浙東路兵馬鈐轄婺州駐劄直
秘閣添差通判嚴州鄭珙移婺州並轉一官幹故贈太
傅潘正夫葬事用吳國長公主請也

乙丑岳陽軍節度使開封儀同三司權主奉濮安懿王

祠事士擢薨贈太傅追封韶王其弟降授郢州防禦使
士曠特復潭州觀察使諸子遷官除職者九人後謚恭
靖

丙寅草料場言行在歲用馬草乞下兩浙漕司收買以
經總制錢償其直從之 詔秘閣修撰提點佑神觀秦

堪今任已滿令接續理任從其請也 左宣教郎王孝

廉謀據成都以叛伏誅初孝廉之父輔以左朝請大夫

守合州輔蔡州人初見所為不法左朝奉大夫史聿時

十二年正月

為潼川府路轉運判官置獄遂寧府窮治之孝廉與其
兄孝忠俱就逮輔憂懼死聿移夔州路轉運判官獄遂
不竟孝廉兄弟知不免陰懷異志即歸所寓成都府破
產招集亡命多市弓劍戰具閭井之無賴者靡然從之
會敷文閣待制四川安撫制置使兼知成都府曹筠當
以是夕詣府學宿齋孝忠與其徒謀夜襲府學殺筠然
後舉事忠訓郎王立伺知其謀與孝忠家婢潛以告本
路兵馬鈐轄左武大夫英州刺史柳佾佾率官兵以素

隊往捕孝忠與其徒相拒敵官軍死者三人佯走趨府
治筠卧閣不出都鈐轄司幹辦公事張行成排闥入告
始授甲討之孝忠等徐步至府門縱火人皆驚散孝忠
等馳出衙西門官軍躡其後孝忠孝廉登樓自刎死孝
忠子大正與其黨樊常等五人為官軍所殺餘黨二十
八人走郟縣後四日皆伏誅轉運副使直徽猷閣吳垌
裒取孝忠文書具言於朝詔劾孝忠反狀餘皆悉原之
官軍以次受賞凡為錢萬七千餘緡聿丹陵人

行成已見紹興

九年於是垆已移知荆南府筠移知宣州然皆未受命

也

日歷紹興二十年七月辛亥左朝奉大夫史聿改除夔州路轉運判官八月辛未左朝請大夫知合州王

輔守本官致任成都記吳垆八月十五日改知荆南府曹筠條十二月二十四日移知宣州

丁卯保義郎閣門祇候劉勲特添差臨安府兵馬鈐轄仍釐務請給人從等並依正官例勲懋弟也

戊辰藉田令楊俟直秘閣主管佑神觀免奉朝請

辛未御史臺主簿胡襄守監察御史 宣正大夫安慶

軍承宣使提舉佑神觀陳腆改提舉江州太平興國宮

任便居住腆內侍也先是有徐思忠者以事繫大理獄
上諭秦檜曰聞思忠事連及腆如見賊證可與盡理行

遣凡數月乃有是命

上語在六月已未徐思忠本末不見以林泉野記考之腆恐是秦檜

府承受
當考

壬申上謂大臣曰頃令諸路帥臣招軍至今多月尚未
有到者可令樞密院舉催

丙子大理寺丞孫敏修面對言州縣獄官不得其人一
切付之胥吏輕重高下悉出其手望下有司參詳將罪

人初入門情犯先令知通令佐親視供責文狀入案然後付獄推鞠修立成法行下庶幾罪人情偽易察使猾吏無以措手詔刑部看詳申省

己卯詔以建康府永豐圩賜秦檜仍令江東漕司同本府葺治限十二月末須管了畢 侍衛親軍步軍副都指揮使武安軍承宣使充福建路馬步軍副都總管王貴卒

壬午保義郎閣門祇候成彥忠為閣門宣贊舍人彥忠

閔之子也

甲申武功大夫吉州團練使新江南西路馬步軍副總管丁祺移江南東路副總使建康府駐劄

乙酉左朝奉郎鄭康佐知惠州代還言陛下臨御以來詔令為民而下者十常八九所以天祐一德民懷有仁然親民莫如守令按察莫如監司若監司巡歷或不周遍則遐方僻壤郡邑官吏循習弛怠奉行必有不謹者望申飭攸司自中興以來省刑罰薄稅斂凡恤民寬厚

之詔令編類成書以賜守令仍令監司歲內分巡所部
要務周備以察奉行詔令之當否官吏之勤惰庶幾咸
思報舉庶職惠養黎元以稱勵精求治之意詔令敕令

所編類

二十五
年成書

丙戌右宣教郎薛仲邕為大理司直仲邕曹泳之甥故
秦檜用之

是月諸路發解舉人而右文殿修撰秦垿當就兩浙轉
運司取應檜親黨或謂平江府觀察推官蕭燧曰秋試

必主文燧詰其故曰丞相有孫就舉漕臺將以屬君燧
謝曰燧初仕敢欺心耶漕檄下乃秀州也至則溢員就
院易一張教授者去塤果前列燧青江人進士甲科既

為檜所怒自是浮沉州縣者十年

此以謝諤所作燧行狀修入但行狀稱丞

相有子又稱燧果前列皆小誤也燧紹興十二年登科
燧十八年登科蓋在其後今年就舉者乃塤耳日歷紹
興二十六年五月辛丑湯鵬舉論陳之茂為秋試考官
違法營私取秦塤於高等不知之茂此時為何官當考

九月丁亥朔左承議郎王之望提舉荆湖南路常平茶
鹽公事之望自荆門代歸獻啓於太師秦檜歷叙勞績

每句疏解其下凡數千言又上少保秦熈書頌其德合於坤之六二熈喜遂有是命

戊子詔自今行在官司斷配罪人應隸本州本城者並配近行在州其已配隸者令所屬配出門以大理少卿張柄援在京舊制有請也

壬辰秘書省正字兼權中書舍人周麟之罷以右諫議大夫史才論麟之意在即真常懷不滿乃與在外狡佞失志不得逞者陰相交結專為是非誑惑羣聽故也

癸巳熙州觀察使都總領河南蕃兵將隴右郡王趙懷
恩為鼎州觀察使充成都府兵馬鈐轄

甲午上謂大臣曰聞潼川路水災可令轉運常平司將
被災州縣檢放賑濟

丁酉右從政郎監行在太平惠民北局林一鳴為敕令
所刪定官一鳴一飛弟也

己亥右諫議大夫史才言臨安府府學教授楊良輔素
無術業頃充平江府考試官陞黜失當不平之恨聞於

鄰境詔罷之

平江府秋試陞黜不知鄰境何以聞不當者

庚子敕令所刪定官吳曾面對乞禁採捕鹿胎為飾因舉真宗皇帝不殺羊羔事以為自澶淵講好之後十有九年不言兵而天下富庶者其源蓋出於此望詔有司告誡士庶之家並不得戴鹿胎冠子及所產之地不得採捕庶幾上副陛下好生之本意詔刑部申嚴施行

辛丑大理寺丞郭唐卿面對論州縣推勘罪人於他處追取會問往往回報稽留致淹刑禁乞申嚴令申程限

施行從之

乙巳左中大夫吳鼎行監察御史卓自楚州召還入對論兩淮定稅之初乞委監司守臣督責諸邑縣令務要均平庶幾民被實惠既對遂有是命

丁未右文殿修撰新知廬州曾慥乞與建康府都統制王權同議營田上曰當令熟議其可否如與之中分其利使軍人樂然從之乃可行也

己酉直秘閣知臨安府趙士彰與直徽猷閣知紹興府

曹泳兩易仍各進職一等

辛亥宰執進呈左朝奉大夫知靜江府陳璘奏廣西邊
面闊遠兵額頗多稅米所入不足贍給祖宗以來隨苗
和糴每石價錢四百或五百文足而漕司從來以苗米
支移所納價錢每石却至三貫文足比之所支和糴本
錢多至數倍望委本路帥臣與轉運司官公共相度少
增和糴之直略鑄折米之價務令適中俾民力稍紓漕
計不乏實公私經久之利詔戶部取索措置申省上又

曰璫善治郡與除直秘閣知潭州其他有昏耄不任事
之人令自陳宮觀時秦檜當國凡謫官在嶺外者雖其
親舊不敢相聞蓋傾險急進者或窺伺中傷以為竒貨
璫頗能調護遷客左朝奉郎通判靜江府汪應辰檜之
所不樂者璫獨與之相善至是檜薦璫有材召赴行在
至則復以長沙命之上亦莫測其故也

日曆二十六年七月戊申載上

語云陳璫本秦檜所薦謂其才可作帥召來不旬日復遣去莫曉其意乃與日曆所載陳璫善治郡聖語全不同疑宋樸所修時政記有遷就也

冬十月丙辰朔皇姪瓊州觀察使居廣遷常德軍承宣使親賢宅宗子六子並進一官以居廣等自陳祖父各任節度使並於靖康年中扈從二聖過軍前其後該遇大禮并聖節合得恩澤共一百二十餘次乞比附收使故有是命 秘書省著作佐郎丁婁明面對言州郡稅額自祖宗以來取之有制而吏弗遵守乃於額外誅求以助公帑望詔有司凡諸州於額外收稅及增置專欄非理搜檢者長吏而下悉置典憲仍委監司按劾翌日

進呈上可其奏因諭曰婁明所論多是專欄等作過其間監官或通知利不盡歸公家而害及百姓如臨安尤甚可令曹泳與漕司多方約束

丁巳侍御史魏師遜言郡守年及七十欲令許其自陳宮觀庶幾公私兩得其便若猶有志在忝竊不自退省者仍望朝廷取索職位姓名與理作自陳宮觀從之

戊午監察御史施鉅為中書門下省檢正諸房公事監察御史吳鼎行尚書左司郎中後五日以鉅為大金賀

正旦使帶御器械冀彥明副之臬為賀生辰使閣門宣

贊舍人張彥攸副之彥明開封人也

彥攸已見

己未責授朝奉郎少府少監全州安置劉岑特差主管
台州崇道觀建昌軍居住 左朝奉大夫直秘閣王縉
致仕從所請也

庚申太府寺丞兼權刑部員外郎史祺孫令吏部差監
臨江軍新塗縣酒稅時武臣孫士道者習幻怪之術而
朝士或與之游祺孫至執弟子禮大理正石邦哲謝邦

彥皆從之侍御史魏師遜奏祺孫敗俗傷教上曰士大夫學先王之道乃從妄人習妖怪之術以欺愚惑衆若不罷斥無以戒後人乃有是命時士道已繫獄於是邦哲邦彥皆坐免官

石邦哲謝邦彥罷大理正在是月丁丑去此凡十八日未知與宋樸有無

相關

當考

壬戌右朝請大夫邢總特降一官以前知道州失覺察諸縣催理積欠二稅會赦乃有是命

丙寅國子監主簿鄭仲熊諸王宮大小學教授王綸並

守監察御史 大理寺丞環周面對乞今後諸州有結
解公事不得退回下縣如情節不圓令官長審實推鞫
依限結斷庶無干証騷擾之弊詔刑部省詳

戊辰端明殿學士簽書樞密院事兼權參知政事宋樸
罷右諫議大夫史才論樸執政無狀樸聞求去章四上
詔以本職提舉江州太平興國宮才言樸為士而不自
愛乃違道罔俗與丐者為伍其欺誕罔俗罪不在少正
邪之下望重行竄逐詔樸落職 大理評事俞長吉面

對言監司郡守間有喜怒自私僚屬少拂其意既無顯過可加則必倚閣請俸至有經年無一祿養者欲望嚴行戒飭如州縣官實有罪戾並依法按治不許倚閣請俸從之

壬申右諫議大夫兼侍講史才充端明殿學士簽書樞密院事 皇叔安遠軍承宣使同知大宗正事士街權主奉濮安懿王祠事

丁丑戶部侍郎徐宗說言宣州太平州圩田為水所壞

乞委司農寺丞兼權戶部郎官鍾世明前去措置從之
其後世明言宣州化成惠民二圩無湖縣萬春陶新政
和猶山永興保成咸寶保勝保豐衍惠十圩當塗縣廣
濟一圩每圩長者數十里用工數百萬計乞以常平錢
米貸民修築亦從之先是宣州大水其流泛溢至太平
州凡太平境內沿湖諸圩悉為衝決會溧陽縣丞龔盜
以修圩之策獻於秦檜檜乃以幹辦府丁襪為江東副
總管往集其事至是繼命世明又以盜為本路提舉司

屬官俾視其工役既而知當塗縣張津謂被水農民流徙過半若令自修力不能辦遂用其說共興長埂周廻百八十里包諸小圩未幾成然塗所役夫萬計人之死者甚衆先是臨安府守臣曹泳薦監激賞酒庫龔釜於檜使掌平江府秀州莊產釜既改秩即令權監六部門又創立點檢人使程頓為名出使二郡釜因徧詣田所相視有瘠薄者即追售田之人勒償元直民甚苦之釜益皆鹽弟津宜春人也

此以日曆所載紹興二十六年三月丙辰周方崇論龔釜三月

癸亥湯鵬舉論鍾世明二十八日二月甲辰葉義問論
龔釜龔釜三章參考修入他書蓋未見也或謂臺官所
言多得之風聞未必盡實臣參之以事而無疑考之以
時而可據則臺官所言乃天下公論何不實之有按日
歷今年八月二十二日己卯有旨永豐圩已賜秦檜可
令江東轉運司並建康府修整損壞去處二十七日甲
申有旨新江西副總管丁禛改差江東副總管建康府
駐劄替張保過滿闕十月二十二日丁丑戶部狀勘會
宣州太平州所管官私圩田內有被水衝破圩埠去處
乞委鍾世明前去措置有旨依故鵬舉劾疏謂世明見
丁禛往太平州修圩遂交結丁禛同往即指此也戶部
指名乞差郎官往外州幹事前亦未有此例是時戶部
無尚書而侍郎乃徐宗說獨真蓋宗說專為秦檜營田
產故有此請也臣謹按檜擅政之日凡涉私事者於時
政記及日歷中一切削去而檜又嚴禁私史故其勞民
為己如此等事後人皆不得而知今當因事書之以見

大理寺主簿吳仲添差簽書保寧軍節度判官廳

公事

戊寅宰執進呈養濟事上曰外路恐奉行減裂須令實

給錢米以施實惠乃詔戶部申嚴行下

日曆今年十二月二十二日丙

子密院檢詳諸房文字齊旦乞申飭州縣如法賑給養濟有旨令戶部申嚴行下不知即此事否或日曆誤繫於彼也戊寅乃十月二十三日

侍御史兼崇政殿說書魏師遜試御

史中丞

壬午監察御史鄭仲熊守右正言前四日仲熊與監察

御史王綸俱被引對而仲熊有是命時秦檜秉政久而張俊楊存中為檜所厚於是仲熊首論定國是久任用與推誠於有功之宿將其言率多阿附時論鄙之

癸未御史中丞魏師遜權侍講

是月金主亮禘享太廟前一夕宿齋正殿祭之日亮被衮執圭乘玉輅備仗衛出通天門詣太廟行禮禮畢易遠遊冠絳紗袍乘金輅奏樂還宮其後禘祭亦如之禘以三年禘以五年用禮官議也

欽定四庫全書

十有一月

按是月
丙戌朔

丁亥慶遠軍節度使知福州張澄提

舉江州太平興國宮以疾自請也澄未聞命而卒贈檢校少保後謚僖敏

戊子右正言鄭仲熊兼崇政殿說書

庚寅徽猷閣待制提舉江州太平興國宮張綱引年告老詔進一官致仕

辛卯右朝散大夫知台州張昌主管台州崇道觀以引年有請也自是守臣相繼有請皆從之昌時年八十九

矣

王明清稱秦檜於官簿中為昌減去十歲已見紹興十二年五月戊申昌差知真州注

壬辰經筵講尚書徹章賜秦檜玉帶名馬

癸巳宰執進呈上顧謂檜曰朕記此書自說書官尹焞始觀焞進講皆其師程頤之說餘無可取檜曰程氏之徒祖宗之諱不避而諱其師之名甚嚴事君事師之道恐不當有厚薄兼已受官乃更欲廩人繼粟庖人繼肉曾不知孟子處賓師之位仕而不受祿則有此禮先是胡安國奉詔修春秋傳於諸經正文不諱故檜及之然

欽定四庫全書

建炎以來繫年要錄

三

程頤元祐中實未嘗言祿檜益誤也

甲午右正言鄭仲熊言工部員外郎楊迥監察御史胡襄心嚮胡寅之門有識之士為之切齒蓋自趙鼎妄立專門互相標榜大開交結詭計周密朝事一切不恤一時羣小所聚而寅為之魁及今事已敗而人猶惟寅是嚮不知國家何負此輩而迥與襄甘心從之凡有從東南來者迥必首詣之訪其蹤跡略無顧避襄比當秋闈監試題目衆已議定襄乃中夜自易之意私其黨初趙

鼎立專門之後有司附會專務徇私不論才與不才有是說必真之高等士子扼腕二十年於茲今襄又為之倡欲使人人盡歸於趙鼎胡寅之門而後已臣所以為國家慮之欲望亟賜罷黜庶使邪正一分而在位者知所戒懼於是迴襄並罷

丙申武德大夫榮州刺史兼閤門宣贊舍人提舉佑神觀潘邵落閤職陞領和州防禦使

己亥平海軍承宣使知南外宗正事士瑋卒年四十六

贈少師追封和義郡王後諡忠靖

庚子吏部郎中沈虛中面對言在外官司取會保明待報文字供申稽遲動涉歲月間有故作不圓脫漏大節致妨行遣結絕在法有三次無回報送不干礙官司究治之文今欲州委通判監司委主管文字凡承受省符置籍記錄每月終具若干已報未報申所屬曹部照會監司按行取籍互相糾察庶得文移不致壅滯詔六部長貳同共看詳申省

壬寅詔為張叔夜立廟於信州永豐縣墓側賜名旌忠
叔夜之死也其家葬衣冠於縣境至是乃請建祠焉

甲辰秦檜進呈太宗正司條令成書上曰昨日徧閱所
修甚有條理可頒行之 右武大夫文州刺史王福特

轉行拱衛大夫福張俊親校也始以車駕臨幸賜第恩
進二秩吏部言礙正法令回授俊再請乃特命之其曹
四人皆自正使陞領遥郡防禦團練使有差

乙巳以經筵徹章賜宰執講讀說書修注官御筵於秘

書省自是以為故事

戊申將作監丞錢端英面對言州縣折帛錢昨已降指揮盡於下戶折納既免鬪成端匹之弊又得折價廉中下之家實受其賜而州縣尚或因仍舊例高下一概科折唯務掊取畸零致使良法美意不得宣布望明詔有司申嚴行下詔戶部檢坐見行指揮仍措置務令必行以優下戶

己酉秘書省校書郎兼權國子博士王佐罷以右正言

鄭仲熊言佐攝職成均試官例當輪出題目佐必讓易之以私所嚮趙鼎之餘黨也

十有二月丁巳左朝請郎陳孝則知英州還奏本州宜安縣稅務月額止於十千而監官請俸兩倍其數不惟州郡過有賠費而於商旅實有阻抑詔戶部取索似此去處並罷

戊午中書門下省檢正諸房公事充大金賀正旦使施鉅等入辭上戒之曰歲遣信使已有定例使指之外不

可生事

癸亥太傅昭慶軍節度使萬壽觀使平樂郡王韋淵薨
贈太師命睿思殿祇候王晉行護葬事

丁卯右文殿修撰提舉佑神觀秦塤為數文閣待制右
承務郎吳益直秘閣以檜辭免進太宗正司敕令加恩
也檜以塤當就省試辭庚午詔俟畢試取旨封塤妻高
氏為和國夫人

乙亥寶文閣學士提舉江州太平興國宮梁汝嘉卒

徽猷閣直學士提舉江州太平興國宮李擢卒於合州
戊寅司農寺主簿王柎直秘閣提舉福建路常平茶事
柎乞外任上覽除目曰柎父雲死於使事可與職名乃
有是命

庚辰集英殿修撰知常州錢周材以親老乞歸養詔周
材充敷文閣待制提舉江州太平興國宮 直徽猷閣
主管台州崇道觀王洋卒

癸未樞密院檢詳諸房文字齊旦面對乞禁止民庶之

家車服踰制詔申嚴行下

閏十二月乙酉朔雪秦檜稱賀上曰是當臘中來歲農事可喜也

戊子皇叔明州觀察使同知大宗正事士籤特遷定江軍承宣使

壬辰敷文閣待制提舉江州太平興國宮錢時敏卒

癸巳福州長溪縣進士黃友龍杖脊刺配廣南遠惡州牢城收管初友龍在臨安府餘杭縣聽讀因與進士朱

思廉不和醉酒作鬧語言指斥法寺鞠實故有是命
丙申宰執進呈次上曰諸郡守條具民事如遠方因軍
興有所科率至今未罷者非因條具何由得聞宜委官
看詳取可行者行之乃命檢正都司官看詳申省取旨
己亥右承事郎楊僊直秘閣主管佑神觀僊侄弟也
辛丑詔三衙管軍御前諸軍都統制保明逐軍統制官
供職滿十年無公私過犯之人申樞密取旨與轉行一
官至承宣使依條回授

癸卯左朝散郎楊椿為荆湖北路提點刑獄公事

丙午秦檜進呈權戶部侍郎徐宗說狀契勘上供諸色
窠名錢物在法不得支兌移用若輒擅侵支各有專一
斷罪條法指揮比年以來州軍往往冒法輕費妄用却
將上供錢物侵借監司略不檢察按治緣即目內外百
色支費浩蕩全藉州軍恣意經理若不申嚴法禁竊恐
日後轉致侵損省計欲乞檢坐行下諸路監司常切覺
察若有違戾侵借除依法斷罪外乞今後更不差注知

州軍差遣若後官任內合撥窠名錢物別無拖欠能措置補還前官擅支錢物每及一萬貫以上與減一年磨

勘至五年止庶幾罪賞必行不致侵蠹財賦從之

熊克小歷

紹興二十二年十一月丁巳時監司守臣不輸常賦專以進竒羨相尚太府卿徐宗說攝貳版曹乃言今後當令先補常賦所逋仍乞以賦入殿最行賞罰詔從之上諭宗說曰版曹久墮卿所論甚當是日以宗說權戶部侍郎此蓋因葛立方撰宗說墓誌所書也立方又稱宗說請於朝俾嗣進者先補常賦於是儲廩益充而斂不及民及陸對上諭之曰版曹久墮此卿所論甚當真計臣也遂除權戶部侍郎以日歷考之宗說此陳此事在版曹已踰年蓋立方遷就技拭之而克不詳考且日歷稱戶部狀云云蓋此事宗說上申尚書省非奏牘也誌

所云獻美事未知宗說果能此否當求他書參考之

己酉大理評事莫濛面對乞令諸縣人戶割移租稅並

須依限開收詔中嚴行下

明年正月
壬戌施行

庚戌金主使宣奉大夫尚書左丞蔡松年假戶部尚書

與廣威將軍秘書少監兼行右拾遺赫舍哩師顏來賀

來年正月

松年已見
上年正月

是歲宗室子賜名授官者二十八人 諸路斷大辟二

十五人 初朝請大夫黃子游知池州代還論青陽縣

苗稅多於諸縣有至十倍或七八倍者如青陽縣每畝上等田三斗貴池縣四升建德縣四升七合東流縣六升之類是也一州之內而輕重不同如此地土肥瘠高下不能相遠臣詢訪其故因南唐李氏嘗以青陽縣為宋齊邱食邑人戶每畝納三斗為食邑之數後來因為稅額望下轉運司究實比附鄰縣所納酌中裁定詔戶部看詳取旨至是有詔減苗稅二分半課米二分歲為錢千八百緡米萬七千石然議者猶謂所減乃經略虛

增之數而齊邱重額未嘗損云

子游奏下日歷繫之紹興二十一年十一月戊

午自後不見如何施行胡兆秋浦志載此事云紹興二十二年申獲指揮故附此年末熊克小歷稱江東轉運常平司為之請蓋誤秋浦志中所載乾道六年陳升卿建明取會事為子游所請而不詳考之也克又稱青陽縣上田每畝一斗九升亦與子游元奏不合按乾道六年二司所奏有云上田青陽縣每畝納一斗九升八合此乃減苗稅二分半課米二分之後數目非子游元奏之時克實甚誤餘具乾道六年五月

建炎以來繫年要錄卷一百六十五

建炎以來繫年要錄卷一百六十五金人地名考證

赫舍哩

原書作統石烈誤改
見卷一百六十四

欽定四庫全書

建炎以來繫年要錄卷一百六十六

宋 李心傳 撰

紹興二十有四年

歲次甲戌 金海陵 煬王亮貞元二年

春正月

按是月 甲寅朔

癸酉初詔郡國同以中秋日試舉人舊諸州皆自選日舉士故士子或有就數州取解者至是始禁之

甲戌大理司直李璟面對乞令諸縣將二稅畸零之數並折見錢各令具鈔庶免重疊催擾之弊詔戶部申嚴

行下

丙子封婉容劉氏為貴妃 大理少卿張柄面對乞州
縣獄案並令明注年月日數毋得復稱今年前月或昨
日之類以示欽恤慎重之意從之

丁丑右通直郎王歷充江南東路安撫司參議官

戊寅地震

己卯右通奉大夫陳康告老詔遷一官致仕 戶部言
諸州上供經總制等錢在法雖許置輕齋起發緣價直

比之行在往往高貴欲將諸路州軍不通水路去處每貫貼支客人兌便優潤錢三十文却於州縣從來起網合破糜費脚剩錢內支給庶幾公私兩便從之

辛巳寧武軍承宣使侍衛步軍司統制戚方為龍神衛四廂都指揮使利州觀察使殿前司右軍統制岳超龍神衛四廂都指揮使洪州觀察使侍衛步軍司統制梁斌並為承宣使超昭慶軍斌寧遠軍和州防禦使殿前司選鋒軍統制王升為宜州觀察使中衛大夫和州防

禦使殿前司左軍統制閻德等七人各進一官皆用去
年閏月辛丑詔書也先是方當依格回授而斌帶軍職
叙位乃在方上宰執進呈上命方以所得一官特帶軍
職庶與斌舊次不致陞降於是行下

二月

按是月
甲申朔

乙酉大理寺丞郭唐卿面對乞禁諸州毋

得輒令屬縣逐月分認醋息錢從之 左迪功郎鄭時

中充國子監書庫官時中仲熊兄子也尚書省言御書

法帖合委官措置頒降乃命時中為庫官專一措置

丁亥詔除名勒停永不收叙人前左從政郎楊炬特送
邕州編管以其弟煒紹興初兩上書譏謗朝政坐累故

也炬行至賓州感瘴死

煒坐罪已見紹興二十二年熊克小歷即於其時書炬連坐羈

置邕州
蓋誤

庚寅左朝請大夫新知邛州許尹入辭論州縣捃撫富
民重行責罰有犯杖罪而罰錢至數百千者望勅有司
自今有違法科罰人戶出錢者雖曾附赤歷亦重寘典
憲詔申嚴行下尹鄱陽人也

乙未貢院言應博學宏詞科左從事郎新平江府錄事
參軍莫濟左迪功郎監潭州南嶽廟王端朝合格詔並
循資與堂除濟歸安人端朝開德人也

戊戌右文殿修撰提舉佑神觀秦塤充敷文閣待制

辛丑詔直秘閣主管佑神觀楊倓楊與特令赴正奏名

廷試

甲辰上謂大臣曰連雨恐傷蠶麥已令降香祈晴矣

乙巳詔保義郎閣門祇候劉懃進職二等忠翊郎劉愿

特除閣門祇候僧悟正與補左街僧錄右武大夫劉允升特轉遥郡二官以貴妃進封推恩也他親屬補轉官者四人本閣官吏並進二官資礙止法人特與轉行

丁未右承奉郎田公弼為右宣義郎直秘閣賜三品服公弼師中子也

戊申大理評事沈正度面對乞戒飭郡縣不得非理科擾小保長庶貧民均被實惠詔申嚴行下

己酉大理評事鞏衍面對言州縣受納米斛必有土居

及寄居官員士人并上司公吏封鈔請求每石坐享錢數百或至一貫以上受納官為之減退升合不擇濕惡却於其餘人戶名下多增斗面以償其數虧公害私莫此為甚望申嚴禁止從之

壬子榮州刺史提舉佑神觀劉懋遷靖海軍承宣使

三月甲寅朔秘書省校書郎兼權太學博士董德元左朝奉郎新知江陰軍張士襄並為監察御史士襄江寧人也

丁巳尚書司勳員外郎兼權中書舍人孫仲鼈罷以右
正言鄭仲熊論仲鼈攝政成均力主專門以私黨與包
藏其姦詭計叵測若不斥去為害尤深故也仲鼈嘗為
李光客故仲熊劾之

己未詔太尉御前諸軍都統制吳璘楊政郊恩蔭補特
依楊存中例於文資內安排以政璘有請也

辛酉上御射殿策試正奏名進士先是秦檜奏以御史
中丞魏師遜權禮部侍郎兼直學士院湯思退右正言

鄭仲熊同知貢舉吏部郎中權太常少卿沈虛中監察御史董德元張士襄等為參詳官師遜等議以敷文閣待制秦塤為榜首德元從謄錄所取號而得之喜曰吾曹可以富貴矣遂定為第一榜未揭虛中遣吏踰墻而白秦熿及廷試檜奏以士襄為初考官仲熊覆考思退編排而師遜詳定虛中又密奏乞許有官人為第一至是策問諸生以師友之淵源志念所欣慕行何修而無偽心何治而克誠塤對策曰自三代而下俗儒皆以人

為勝天理而專門為甚言正心而心未嘗正言誠意而
意未嘗誠言治國平天下而於天下國家曾不經意頑
頓亡節實繁有徒慮亡不懷諂而嗜利自營者此而不
黜顧欲士行之無偽譬猶立曲木而求直影也舉人張
孝祥策曰往者數厄陽九國步艱棘陛下宵衣旰食思
欲底定上天祐之畀以一德元老志同氣合不動聲色
致茲昇平四方協和百度具舉雖堯舜三代無以過之
矣又曰今朝廷之上蓋有大風動地不移存趙之心白

必在前獨奮安劉之畧忠義凜凜易危為安者固已論道經邦燮和天下矣臣輩委質事君願視此為標準志念所欣慕者此也曹冠策曰自伊川唱為專門之學蔽於一曲不該不徧述正道而稱邪侈好誇大而無實用蓋其初有得於釋氏潛竊其說入室操戈而伐之習其學者尤為迂誕為師者不傳旨要而使之默會為友者不務責善而更相比周適足以戕賊善端而已故凡為伊川之學者皆德之賊也又曰自西學盛行士多浮偽

陛下排斥異端道術亦有所統一矣至此而或有弗悛則鬼瑣之徒堯舜所不能化者也豈容違於兩觀之誅乎臣願陛下至誠樂與勿貳勿疑惟和惟一時則勿有間之則於萬斯年受天之祐異端何自而芽蘖哉於是師遜等定壻為首孝祥次之冠又次之上讀壻策覺其所用皆檜熺語遂進孝祥為第一而壻為第三賜孝祥以下三百五十六人及第至同出身時檜之親黨周夔唱名第四仲熊兄子右迪功郎時中第五秦棣子右承

務郎焯揚存中子右承事郎俊並在甲乙科而仲熊之
兄孫績趙密之子成忠郎靡秦梓之子右承事郎焯德
元之子克正曹泳之兄子緯檜之姻黨登仕郎沈興傑
皆中第天下為之切齒孝祥祁子冠東陽人檜館客黃

開封人興傑永嘉人也

何備龜鑑掄魁所以待天下士也既私其子煇又私其孫父子

親黨環列要津雖霍光之根據亦不是過云呂中大
事記曰檜子煇既嘗為舉首又以其孫墳為舉首上覺
之遂居第三進士榜中悉以親黨居之天下為之切齒而士子無復天子之臣矣

丁卯左承事郎簽書劔南東川節度使判官廳公事趙

達為秘書省校書郎先是總領四川財賦符行中有子
預薦意達必為類試考官密以文屬之達不啟緘既試
符氏子不預奏名行中怒因事捃撫達甚峻然不能害
也

庚午皇叔眉州防禦使士諳為宣州觀察使右監門衛
大將軍和州防禦使士奇落階官以其兄士奎薨故有
是命

辛未敷文閣待制新知宣州曹筠提舉江州太平興國

宮從所請也王孝忠之謀亂也議者以為當責帥秦檜
右之乃俾奉祠焉

壬申鄂州駐劄御前諸軍都統制田師中奏武崗軍徭
人楊再興已就擒劉旦之帥潭也再興既還建炎初所
侵省地至是八年猶抄掠不已師中遣前軍統制李道
討平之上覽奏曰方國家閒暇之時寇盜竊發擒之足
以靖民可如所請令檻赴行在時再興已老諸子惟正
修聚人最多頗姦猾而正拱者最兇悍於是再興與正

拱兄弟皆得正修繼就擒先是吉州盜胡邦寧攻劫衡
郴桂陽三州之間破安仁縣提刑司遣土兵射士捕之
為所敗未敢進 詔左承事郎諸王宮大小學教授劉
珙合赴行在供職珙子羽子也

丙子特奏名進士呂克成以下四百三十四人武舉進
士鄭砮等十六人特奏名二人授官有差而平等岳建
壽特授保義郎以弓馬絕倫故克成常州人建壽超子
也

戊寅宰執進呈大理評事劉敏求面對劄子論諸州不

依條限印給屬縣租稅簿

熊克小歷劉敏求言州縣不依法即時割稅有害於民按

敏求此奏乃論每年諸縣造簿送州印給留滯未嘗言及割稅也

乞申嚴法禁上曰法

令固在如官吏奉行不虔終亦無益知州須歷民事通

曉利病者為之乃命監司以時檢察有不如令按劾以

聞

庚辰右正奉大夫提舉台州崇道觀宋貺知建康府先

是右朝散郎王循友守建康因事忤秦檜故罷去而用

貺代之

日歷不載循友罷命建康知府題名循友離任在四月二日去此凡四日循友六月辛丑除名

辛巳將作監丞錢端英面對論州縣鞠獄事之大小各有定限至四十日而止有司往往虛文枝蔓逮及無辜至有踰年而獄不具者何以上副恤刑之意詔申嚴行下

夏四月

按是月癸未朔

甲申左朝散郎提舉淮南東路常平茶

鹽公事孟處義言去年煎鹽比舊額增十五萬五千餘

石

五十斤為一石支發袋鹽增四萬六千七百餘袋鈔面通貨

錢增八十五萬四千餘緡并受鈔住賣茶鹽並皆增羨
一司官吏委是宣力詔處義進一官屬官及職級有名
目人遞減磨勘餘賜帛有差

乙酉右承議郎敷文閣待制提舉佑神觀秦埵特遷左
朝請郎兼實錄院修撰仍許陳乞親屬章服一名舊制
鎖廳及第人不轉官至是吏部乞比附秦煒體例取旨
推恩故有是命時埵年纔十八也

丙戌上謂大臣曰三衙諸軍招填闕額久未足敷於是

樞密院請均下諸路帥司分限招填期以三年課其殿
最從之

戊子右朝請大夫蔡向知滁州還言兩淮州縣之吏尚
有貪名舉好興作者如開田本以勸耕也虛增頃畝因
成騷擾起稅本以薄賦也暗加勺合遂致剝削凡此豈
所以仰副陛下愛育元元之意欲望申飭官吏違者令
監司郡守按劾從之

己丑上詣景靈宮朝獻有利州民王孝先邀駕訴閬州

守臣石中奉大夫王陟慘酷不法

陟前任知利州為趙不棄劾罷訴詞蓋利

州事也

後二日輔臣進呈次上曰此事宜押送本路監司

究實蓋上慮蜀道險遠追逮為勞也

辛卯右承事郎直秘閣張子仁主管佑神觀仍賜紫章服免奉朝請

庚子宰執進呈大理寺主簿郭淑面對劄子論州縣受納物帛吹毛求疵稍不及格即以柿油墨烟連用退印望嚴戒飭上曰此重為民害可令監司覺察按劾如失

覺察令御史臺彈奏仍許民越訴

辛丑西南小張蕃貢方物

乙巳進士孔播為右承奉郎襲封衍聖公先是播之父右宣教郎衍聖公玠卒于衢州守臣以聞故有是命

戊申太府寺主簿李文中面對言比歲州縣多侵用常平義倉米既失經常之數亦乖惠養之方望詔有司申嚴其禁從之

己酉羅殿國貢名馬方物

五月癸丑朔日有食之

丁巳鄂州駐劄御前前軍統制李道左軍統制郝晟建
康府駐劄御前水軍中軍統制李進彥鎮江府駐劄御
前右軍副統制單德忠等十一人各遷一官亦用去年
閏月辛丑詔旨也

庚申權尚書吏部侍郎李如岡為敷文閣待制知泉州
樞密院檢詳諸房文字齊旦直秘閣提舉淮南東路
常平茶鹽公事

辛酉右正言鄭仲熊言陛下偃革休兵已見成效至於歲時慶賀驛騎交馳盛典縟儀所以燕遇接納之勤情文備至惟是州縣之吏或不能上體聖意間有減裂欲望申勅有司凡迎勞館餞之禮務加嚴整稍有慢戾臣得按劾以聞從之

癸亥監察御史王綸罷以御史中丞魏師遜奏綸因其兄綽弟紘舉進士不第而怒形於色謗罵考官也綸本師遜所舉至是綸以論事忤秦檜意師遜懼即自言智

識淺昧於綸不得其詳望將綸罷黜庶使臣有改過之實云

乙丑左宣教郎張扶為國子博士 右承奉郎吳曾為太常寺主簿

丁卯直徽猷閣知荆南府吳垌主管台州崇道觀以垌引疾有請也時昂澧茶寇猖獗殺傷潭昂州巡檢官樊淑浦縣垌未受命以憂死左朝請大夫荆湖北路轉運判官程敦臨被旨攝帥事以策授兵馬鈐轄邵宏淵且

往招安寇乃息

茶寇事以通義志及王之望所申修入據之望申乃今年三月以後事日歷今

年正月乙亥左朝請大夫知利州程敦臨除湖北轉運判官八月癸未知荆南府吳垌守本官職致仕故因垌

得祠遂書之更源詳考

戊辰中書門下省檢正諸房公事施鉅權尚書吏部侍

郎右宣教郎林一鳴為司農寺主簿

庚午皇叔和州防禦使知西外宗正事士衍為宣州觀

察使令再任

辛未金主遣金吾衛上將軍工部尚書耶律安禮正議

大夫尚書吏部侍郎許霖來賀天申節

六月癸未朔上謂輔臣曰官司賑濟止及近郭游手之人其遠處宜令提舉官及州縣常平官親往措置務使實惠及於貧民 大理正陳良翰面對言令甲職田租課抑令人戶折納價錢而增直者以等差計贓坐罪州縣之吏未免冒犯乞申嚴法禁從之 左太中大夫提舉江州太平興國宮汪藻卒藻黜居永八年累赦不宥請還政不許至是卒藻工於儷語其所為制詞人多傳

誦

乙酉右文殿修撰知廬州曾慥高郵軍使吳祖棣並罷
祖棣子也時慥上疏自訟不受張邦昌偽命乞付史
館御史中丞魏師遜言棣不能以身徇國盡遣天屬歸
之北朝雖族誅之不足以快天下又烏可錄用其後慥
既失節比輒肆狂妄之言反欲盜忠名以干進此最姦
邪之大者罪不可貸宰執進呈上曰棣與王時雍莫儔
在漢法當誅且族朝廷寬大一切置之若復錄用其子

何以示天下自今毋得與堂除上顧秦檜曰當時忠義無若卿者檜曰臣一時守職遭遇陛下遂依日月之光上曰此卿之謙辭也尚書右司郎中兼權中書舍人吳棖罷右正言鄭仲熊論棖本蔡卞之近親黨習以成縉紳目為常州一蠹銜命出疆公肆哀掠并與北貨厚載而歸若不斥去則此輩自作不靖動搖國是不可不慮故有是命

癸巳端明殿學士簽書樞密院事史才罷御史中丞魏

師遜勅才天資陰賊頃受李光薦改秩迨今陰相交通
謀為國害屢貽書問不憚數千里之遠凡光所厚者悉
與結託包藏禍心自為不靖右正言鄭仲熊亦言李光
曩知温州孫仲鼇掌其表章才用其薦書以改秩及今
得路遂與仲鼇及光所厚者互相交結密通光書於萬
里之外蓋欲陰連死黨以搖國是伏望亟行竄逐才聞
乃再章求去初命以舊職提舉江州太平興國宮師遜
等再論遂落職

甲午御史中丞兼侍講魏師遜充端明殿學士簽書樞
密院事尋兼權參知政事

乙未權尚書吏部侍郎陳相卒

丁酉大理司直李璟面對乞申嚴法禁獄事連婦女童
稚別有證佐可以結絕者勿追從之

庚子上諭大臣曰當茲劇暑待差遣人速與發遣其關
官處或遷或召卿等宜商量進擬

辛丑右朝散郎前知建康府王循友特貸死免籍沒家

財送藤州安置男右承奉郎前江南東路安撫司主管
書寫機宜文字滋追兩官勒停特除名弟右文林郎新
奉國軍節度推官循訓追四官勒停特除名送雷州編
管右朝散郎新添差通判饒州韓參追兩官勒停特除
名送德安府編管初循友在任嘗斷配宰臣秦檜族人
檜銜之遂興此獄既而棘寺言循友盜取官錢受所部
乞取金銀冒請宣借口券入已減價詭名收買沒官產
業違法差參主管機宜文字因與參謗訕朝政循訓與

滋偷盜官錢而循友不覺察故有是命

日歷于秦檜當國時被罪之人

多不言其故獨於循友一事書之會要亦同不知何人當筆惜乎其不廣也今撫其可考者依此例具書之未

詳者則闕之更須參考

癸卯手詔曰息兵專以為民四川州縣雖屢降指揮減免錢物以寬民力尚慮措置未盡委制置司總領所同其方便措置務在不妨軍食可以裕民事逐一條具申尚書省取旨 監察御史董德元守殿中侍御史

甲辰秦檜進呈禮部乞賣紫衣師號上曰自紹興四年

江上用兵亦嘗用此以相資助今可檢舉 保寧軍承
宣使主管侍衛馬軍司公事成閔為慶遠軍節度使以
積閔遷也 左朝散大夫知衢州王曦罷左中大夫提
舉江州太平興國宮王師心知衢州時飢民俞八等嘯
聚為盜而曦措置乖方諸盜結集至千餘人掠嚴之壽
昌焚倉庫殺平民事聞秦檜因奏曦有賊汙不法事在
有司乞先次放罷上曰曦卿親戚今罷之勝如罷其他
十數人也既而殿前司遣將官辛立將兵千人往捕賊

遂平

八月乙未俞八等行遣九月丁巳辛立等轉官熊克小歷云盜雖捕獲而猶未定詔以王師心知懼

州民始安堵按師心除命與曠同日此時盜猶未平今不取

監察御史張士襄守

尚書左司郎中

乙巳大理評事沈正度面對言迺者陛下俯從臣僚之請令川廣京湖等州應禁奏案具錄副本報提刑司繳奏以先到者約法欲使獄無滯訟德至渥也尚慮所過遞鋪不即傳送以致逗遛望令當職官常切點檢上曰可令州縣以時支給月糧此輩方肯久住不致闕額

熊克


小歷稱言者論二廣舖兵之弊上曰云云蓋失於鹵莽也

丙午秘閣修撰新知廣州陳楠卒

戊申大理評事莫濛面對論民間不願承募保長正者蓋官司以他事役之望申嚴法禁詔戶部檢坐行下

己酉大理評事劉敏求面對言薦舉之法昭若日星比年以來監司郡守有以一章而舉二人甚至於三四人前所舉者未用後來求者復舉之名曰改舉黷害風教莫此為最望明詔有司申嚴法禁凡所舉人實有改節

及有事故不用方許改舉無故而改者重寘以法庶幾
杜絕奔競仰副綜核名實之意從之



建炎以來繫年要錄卷一百六十六